

Communicaziun allas medias digl cumegn da Surses (nr. 06-2019)

Surses: Igl cumegn nizegia igl potenzial cultural

Igl cumegn da Surses sustigna igl project cultural „Salvar igls Mulegns“ dalla Nova Fundaziun Origen cun ena contribuziun da sustign impurtanta. Ultra da chegl venda igl cumegn all’instituziun culturala treis parcelas agls Mulegns. Cun chellas dus decisiuns è Origen en grond zap pi manevol alla realisaziun digls project cultural. Da l’oter mang vign uscheia do la pussebladad da migliurar igl traffic tras vischnanca digls Mulegns.

Cun gronda pluralitad ò la radunanza communal approvo ena contribuziun da sustign da max. fr. 510'000 an favour dalla Nova Fundaziun Origen per la realisaziun digl project cultural „Salvar igls Mulegns“. An chel connex ègl er nia consantia cun clera pluralitad da vender treis parcelas ad Origen pigl prietsch simbolic dad en franc. Siva da chellas dus decisiuns è l’instituziun culturala Origen neida en grond zap pi manevol alla realisaziun digl project elaboro, tgi prevei igl mantignamaint digl Post Hotel Löwe e dalla schinumnada „Tgesa Alva“ cun la fegnameira dad eriger agls Mulegns en museum da viadi vital. Chel duess rachintar l’istorgia digl viagier cun antschever tar la viglia istorgia digls pass sur l’emigraziun grischuna ed igls scumanzamaints digl turissem aint igl Grischun anfignen tar temas dalla migraziun globala. Igl effect secundar positiv è, tgi an connex cun la realisaziun da chel project cultural so er neir migliuro a madem mument e da moda persistenta igl traffic tras vischnanca digls Mulegns. Per reuscheir chegl vign la „Tgesa Alva“ spustada per en pêr meters.

L’investiziun totala per la realisaziun digl project cultural „Salvar igls Mulegns“ monta a radond 5.6 miu. francs. Davart da terzs è gio nia garantia alla Nova Fundaziun Origen contribuziuns da radond 3.6 miu. francs. Vetiers vign ossa la contribuziun da sustign impurtanta digl cumegn, tgi è premissa, per tgi er otras fundaziuns tgi promovon la cultura paian contribuziuns. Las lavours da construcziun per spustar la „Tgesa Alva“ duessan antschever gio igl otgover e niron a cuzzar radond en onn. L’amprema gronda exposiziun digl museum da viadi è planisada igl onn 2021.

Midada dalla concessiun digl dretg dallas avas tranter cumegn e las oet

Unanimamaintg ò la radunanza communal approvo en’aggiunta per la concessiun digl dretg dallas avas purifitgeida digls 7 da favrer 1969 tranter igl cumegn e las Ovras electricas digl martgea da Turitg oet per l’utilisaziun dalla forza hidraulica dalla „Ava da Nandro“. Cun chell’aggiunta vign lubia allas oet da ceder a terzs ena quantiad d’ava da maseira subordinada. Cotras è neida stgaffeida la basa legala, per tgi la Pendicularas Savognin SA possa reterer ava dallas oet per annavar artificialmaintg igl territori da Radons. La decisiun definitiva da chel affar ò da neir sottomessa agl cumegn d’urna per l’approvaziun.

Ulteriouras decisiuns

Las votantas ed igls votans on approvo a caschung dalla radunanza communal la revisiun parziala digl reglamaint d’indemnisaziun digl cumegn da Surses, tgi regla las indemnisaziuns dallas instituziuns communalas. Cun la revisiun vign l’indemnisaziun annuala pigl mastral fixada er agl avigneir sen fr. 110'000.

Er la dumonda digl titular d’ena firma d’electro per cumprar ena surfatscha da taragn da 2'317 m² ainten la zona d’industreia «Punt» a Cunter, an possess digl cumegn, per construir ena halla da produziun è neida approvada sainza cuntervouch.